

Das heilig Wort vnd Sacrament
gehört/ gebraucht bis an sein End.
Sein Farth war in die Kirch hinein/
Da er das Hertz vnd Hende sein
Thet zu dem lieben Gott auffhebn/
Stundt gegn dem Predigstul gar ebn/
So oft des HERREN Christi Nam
Erschalt/ vnd wurd gedeutet an/
In Demuth bog er seine Knie/
Welches man kaum gesehen je.
War Christlich/ from/ getrew/ gerecht/
Friedsam/ warhafftig vnd geschlecht.
Sein Burger liebt er allesampt/
Vnd sonderlich das Predigampt/
Hat dieser gravitetisch Herr
Sehalten in grosser Würd vnd Ehr.
Er war ein Kirch- vnd Schulfreundt/
Die trewen Diener er recht meint.
Wie gar ein fleissign Auditorn,
Hat doch die Cantzl des Orts verlorn.
Auch war bey Ihm geachtet gleich
Der Arm so viel als gar der Reich.
Vnd wem er kundte helfen nürt/
Sein trewes Hertz vñ gmüth man spürt.
Gott